

**Parlimen: Kerajaan Perlu Belanja RM2.65 Bilion Untuk Tanggung Kos  
Penyenggaraan Rumah Pangsa Seluruh Negara  
Bernama  
27 September, 2012**

KUALA LUMPUR, 27 Sept (Bernama) -- Kerajaan perlu membelanjakan RM2.65 bilion jika memikul tanggungjawab menampung keseluruhan kos penyenggaraan 4,300 kawasan rumah pangsa kos rendah di seluruh negara.

Menteri Perumahan dan Kerajaan Tempatan Datuk Chor Chee Heung berkata jumlah itu adalah anggaran yang dibuat jika kos penyenggaraan satu kawasan rumah pangsa kos rendah mencecah RM500,000 setahun.

"Ini pun saya agak-agak saja ini. Saya percaya ini mungkin lebih daripada jumlah RM2.65 bilion ini supaya penduduk mendapat tempat yang lebih selesa," katanya ketika menggulung perbahasan Rang Undang-undang Pengurusan Strata 2012 di Dewan Rakyat pada Khamis.

Beliau berkata sejak 2009, kerajaan telah membelanjakan RM200 juta untuk menyenggara rumah pangsa kos rendah di seluruh negara yang melibatkan perkara asas seperti memperbaiki lif rosak serta harta-harta bersama.

"Rumah-rumah pangsa yang dibina oleh kerajaan negeri atau persekutuan kalau ada aspek yang perlu dibantu seperti memperbaiki lif, mengecat bangunan kita (kerajaan persekutuan) keluarkan 90 peratus dan jawatankuasa atau persatuan penduduk (kalau ada), keluarkan 10 peratus saja," katanya.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=697837>